

Wulf Wagers wunderliche Weltbetrachtung

Mir lebat oifach falsch rom

I fend onser Läba lauft völlig verkehrt rom. Des wird jo emer schlemer henda naus. Mir sottat eigentlich rückwärts läba ond mit am Tod a'fanga. No dät's Läba en meiner Idealvorstellung so ausseha:

Du liegsch en zwoi Meter Tiefe em Grab, wirsch ausgraba ond kriegsch als erschtes 's Erbe von deine Kendr z'rückzahl. Mit dem Schotter gohsh no ens Altersheim. Dort goht's dir von Monat zu Monat besser ond kriegsch drzua na no jeden Monat en Haufa Geld raus. Dann wirsch naugschmissa, weil de z'jong bish, spielsch a paar Johr Golf ond kriegsch a fette Rente vom Schdaat. No kriegsch von deim Arbeitgeber a goldene Uhr on



fängsch gaaaaanz langsam a zom Schaffa. Ganz langsam!

Ond wenn de do drmit durch bish, gosch auf d' Uni. Inzwischen hosch soviel Geld, dass de a Studentaläba en Saus ond Braus genießa kasch, nemmsch Droga, hosch nix als Fraua (wahlweise Männer) em Kopf ond saufsch dr ständig da Kraga ab.

Wenn de dodrvo so richtig stumpf gworda bish, wird's Zeit fir d' Schual, die nadierlich mit ra

einwöchiga Klassafahrt en 's benachbarte Ausland a'fängt.

En dr Schual wirsch von Schuljahr zu Schuljahr bleeder, bis de am guada End au do wieder rausfliegsh. Zu dem scheena A'lass kriegsch a riesagroße Tüte voll Süßigkeit.

Drnoch spielsch a paar Johr em Sandkaschta, saugsch an de Herzer von deiner Muaddr rom. Anschließend schwemmsch neun Monat en dr Gebärmutter rom ond beendesch dei Läba mit ma Orgasmus. Des wär doch super!

Bis näggschd Woch'
Ihr

Wulf Wager